

摘藻堂四庫全書薈要

集部

欽定四庫全書薈要

集部

御選宋詩卷四十

詳校官原任主事_臣李斯咏



欽定四庫全書薈要卷一萬八千三百四十七

集部

御選宋詩卷四十

五言律詩六

楊萬里

題湘中館

江欲浮秋去山能渡水來
姪隅蠻語雜款乃楚聲哀
寒早當緣閨詩成未費才
愁邊正無奈歡伯一相開

涉小溪宿淡山

徑仄愁斜步溪深怯正看破船能不渡晴色敢辭寒白
退山雲細青還天宇寬險艱明已濟魂夢未渠安

自音聲巖泛小舟下高溪

晚日黃猶暖寒江白更清遠山衝岸出釣艇背人行舟
穩何妨小波恬爾許平大魚不相報撥刺得吾驚

臘後

雪暗虛疑暮江空分外寒如何山雨過便爾岸沙乾奈
此詩愁得懷哉歲事開梅殘吾更忍不折一枝看

和仲良病中耽睡

居士何曾病羣兒錯見憐對床正風雨落紙忽雲烟欲
夏花全退猶寒柳尚眠如何睡鄉裡只是著詩仙

和仲良春晚即事

幾許春纔好誰令綠遽深風光曾著眼時序只驚心永
日便甘寢羈懷怯苦吟春歸猶作客晴少更多陰
欲與東風說休吹墮絮飛吾行正無定魂夢豈忘歸花
暖能醺眼山濃欲染衣只嫌春已老此景也應稀

貧難聘歡伯病敢跨連錢夢豈花邊到春俄雨裏遷一
犁關五秉百箔候三眠只有書生拙窮年墾紙田

筍改齋前路蔬眠雨後畦晴江明處動遠樹看來齊我
語真彫朽君詩妙斲泥殷勤報春去恰恰一鶯啼

早行見螢

淺草時雙起深叢忽獨明情知耽月淡意欲照人行扇
撲高無奈風斜半欲橫書帷吾已嬾不擬著囊盛

明發新塗晴快風順約泊樟鎮

雨到中宵歇心知逗曉晴排雲數峰出漏日半江明風
借輕帆便天催懶客行不應樟鎮酒無意待人傾

到龍山頭

影靜長安道涼風響轡銜海天低到水江日晚明帆潮
遣先驅壯聲吞絕島巉黃塵征袖滿却愧著朝衫

理疏

小摘我何惜頻來徑自成青蟲捕仍有蠹葉病還生貧
裏猶存竈霜餘正可羹窺園未妨學抱甕更須營

昌英叔門外小樹木犀早開

觸鼻無從覓香林小綴黃旋開三兩粒已作十分香入
夜偏相惱攪先有底忙移牀月枝下坐對略傳觴

過安仁岸

野水工穿石疎林不掩巢雨蒲拳病葉風篠禿危梢短
脰知誰續長腰強自抄茲游良不惡物色困詆嘲

過皂口

贛石三百里春流十八灘路從青壁絕船到半江寒不

是春光好誰供客子看猶須一樽綠併遣百憂寬

放船

岸岸人家住門門水面開老翁扶杖立穉子看船來一
夜鳴春雨諸灘漲綠醅順流行自快更著北風催

感興

行役忘哀暮逢春感物華一來梅嶺外三見木棉花山
鹿寧遊市江鷗本卧沙紅塵無了日白髮未還家

題尤延之右司遂初堂

漫仕風中絮歸心水上鷗把茅新結屋藜杖舊經丘花
底春勾引燈前夜校讐何如添我住二老更風流

舟過桐廬

瀟灑桐廬縣寒江繞一灣朱幡隔綠竹白塔映青山稚
子推窗出舟人買菜還峰頭好亭子不得一躋攀

宿蘭溪水驛前

繫纜蘭溪岸開襟柳驛窗人爭趨夜市月自浴秋江燈
火疎還密帆檣隻更雙平生經此縣今夕駐孤幢

阻風鄉口一日詰朝船進雨作再小泊雷江

朔吹憎船進東瞰讓雨行雲移青嶂動鴉度白雲明淹
泊寧吾願吟哦且客情江邊一林柳憔悴侶餘生

劉儀鳳

自歸州陸行至夔州

戶口邨無幾犁鋤力不堪林荒樗櫟壽月黑虎狼貪幽
絕雲眠穩清閒谷飲甘故山深未極壤斷葢茅菴
曠野無人宿危高犯雨過嶺雲堆巔鼎剎海現兜羅酒

觸秋懷壯天留暮色多不勝行役苦裁入竹枝歌

張孝祥

山居

松韻笙竽徑雲容水墨天人行春色裡鶯語落花邊修竹三間屋清泉二頃田了無官府事雞犬慕登仙

李燾

客懷

久客厭塵土幽居懷翠微只餘清夜夢長作故山歸菊

已開三徑松應長十圍晨鐘忽驚覺猶有露霑衣
壯矣府中縣索如城外邨墨池今埽迹石筍舊餘根風
急漢弦斷雨多秦鏡昏新秋一懷古情緒若為論

洪适

宿佛窟寺

籃輿登佛窟高閣望中清古木爾許蔭飛泉無限聲雨
消今日暑雲作晚來晴獨對青山久相逢如有情

交翠亭

并序

政和丙申家君主寧海簿明年作交翠亭是秋亭
成而适生後廿有八年适來貳郡事行縣至此感
舊成詩

三十年中事鸞棲築一亭寒聲長新籜清悶拂疎櫺水
轉前時綠山濃遠處青重來勤問信此別記秋螢

次韻蔡瞻明江樓秋晚

斜照穿林迥歸雲歛岫遲蝸文寒壁篆蛛巧暮簷絲待
月是愁處對山無倦時掀髯阻談綺細讀寄來詩

寒巖寺

峭壁插青冥層巖覆化城空中清響發幽處慧燈明萬
瓦足雲氣四簷無雨聲豐干不饒舌此地孰知名

曉發秦安驛

秋夢不能曉起行山徑迷小車驚宿鷺列炬誤鳴雞冷
覺霜華重光瞻斗柄低金庭有佳處芳桂想幽棲

朱熹

殘臘

殘臘生春序愁霖逼歲昏
小紅敷艷萼衆綠被陳根
陰壑泉方注原田水欲渾
農家向東作百事集柴門

試院雜詩

齋宇夜沉寂淒涼羣物秋
卧聽簷溜盡心屬故園幽
了事知何日分曹喜勝流
笑談真暫爾不敢恨淹留
窮秋一雨至暫止復蕭蕭
曲沼寒流滿空庭涼葉飄
聞鐘懷故宇覽物屬今朝
一詠歸來賦頓將形迹超

巖桂

山中綠玉樹瀟灑向秋深小閣芬微度書帷氣欲侵披
懷清露曉遇賞夕嵐陰珍重王孫意天涯淚滿襟

喜晴

衝飈動高柳淥水澹微波日照秋空淨雨餘寒草多放
懷遺簿領發興託煙蘿忽念故園日東阡時一過

八月十七夜月

忽忽秋逾半清輝萬里同遙知竹林夜共賞碧雲空寂
寞盈尊酒淒涼滿院風寒塘空自淥不似小園東

南安道中

曉澗淙流急，秋山寒氣深。
高蟬多遠韻，茂樹有餘陰。
煙火居民少，荒蹊草露侵。
悠悠秋稼晚，寥落歲寒心。

再至城樓作

荒城一騁望，落景麗譙門。
隱隱鐘猶度，依依嵐欲昏。
風霜非故里，禾黍但秋原。
極目歸來晚，茲懷誰與論。

晚望

禾黍彌平野，淒涼故國秋。
清霜凝碧樹，落日翳層丘。
覽

物知時變為農覺歲道不堪從吏役憔悴欲歸休

苧溪道中

秋山有紅樹忽憶野田中禾黍收將盡氛埃晚欲空登
原悲落景倚杖怯高風更有寒塘水應將此處同

同安道中

祇役東原路長風海氣陰蒼茫生遠思僚慄起寒襟午
泊僧寮靜晷投縣郭深拙勤終不補誰使漫勞心

西郊縱步

西郊一遊步極目是秋山積水羣峰碧清霜楓樹殷故園心不展投策詎能閒且適平生意無令雙髻斑

濯足萬里流

褰裳緣碧澗濯足憇清幽却拂千巖石聊乘萬里流氛埃隨脫屣步武欲橫秋極目滄江晚烟波殊未休

孤鶴思太清

孤鶴悲秋晚凌風絕太清一為棲苑客空有叫羣聲天矯千年質飄飄萬里情九臯無枉路從遣碧雲生

安溪書事

清溪流不極夕霧起嵐陰虛邑帶寒水悲風號遠林涵
山日欲晦窺閣景方沉極目無遺眺空令愁寸心

送王季山赴龍溪

故人千石令便道此之官契濶三秋永逢迎一笑歡田
園知不遠謠俗問非難已想窮元默鳴絃亦罷彈

次甸父韻

五字何人寄鰈鳴滿袖金劇知多暇日誰與共幽尋簿

領淹窮海鶯花繞故林功名終好在且莫負初心

知郡傅丈載酒襆被過煮於九日山夜汎小舟
弄月劇飲二首

扁舟轉空濶煙水浩將平月色中流滿秋聲兩岸生杯
深同醉極嘯罷獨魂驚歸去空山黑西南河漢傾
誰知方外客亦愛酒中仙共踏空林月來尋野渡船醉
醒非各趣心跡兩忘緣江海情何限秋生蓬鬢邊

茉莉

曠然塵慮盡為對夕花明密葉低層幄冰蕤亂玉英不
因秋露濕詎識此香清預恐芳菲盡微吟遶砌行

同僚小集梵天寺坐間雨作已復開霽步至東
橋翫月賦詩二首

傑閣翔林杪披襟此日閒層雲生薄晚涼雨遍空山地
迴衣裳冷天高澄霽還出門迷所適月色滿林闕

空山看雨罷微步喜新涼月出澄餘景川明發素光星
河方耿耿雲樹轉蒼蒼晤語逢清夜茲懷殊未央

梵天觀雨

持身乏古節寸祿久棲遲
暫寄靈山寺空吟招隱詩
讀書清磬外看雨暮鐘時
漸喜涼秋近滄州去有期

登閣

橫空敞新閣高處絕炎氛
野迥長風入天秋涼氣分
憑欄生逸想投迹遠人羣
終憶茅簷外空山多白雲

梅花開盡不及吟賞感歎成詩聊貽同好二首
憶昔身無事尋梅只怕遲
沉吟窺老樹取次折橫枝
絕

艷驚衰髻餘芳入小詩今年何草草政爾負幽期
槩几冰壺在梅梢雪蕊空不堪三弄咽誰與一尊同
鼻觀殘香裏心期昨夢中那知北枝北猶有未開叢

宋文示及紅梅臘梅借韻兩詩輒復和呈以發
一笑

聞說寒梅盡尋芳去已遲冷香無宿蕊穠艷有繁枝正
復非同調何妨續舊詩廣平偏嫉媚鐵石悟心期
風雪催殘臘南枝一夜空誰知芳草裡却有暗香同質

瑩輕黃外芳騰淺絳中不遭岑寂侶何以媚孤叢

呈黃子厚

茅齋塵事遠幽獨興無窮永晝呻吟內新涼愁思中朱
顏非昨日綠鬢又秋風珍重牆東客遙憐此意同

次韻彥采病中口占

一榻流光度篝燈遙夜闌短衾閒自擁清鏡莫頻看竹
密初驚雪梅疎却耐寒從今花木夢無復在雕欄

奉陪判院丈充父平父兄宿回向用知郡丈壁

間舊題之韻

暮雨停驂處僧廬古道邊千峰環傑閣一水下平田行
役無期度經過幾歲年明朝須飽飯躡足上寒烟

蒙判院丈示及再用元韻之作率易和呈以求
指誨

疇昔經行地溪山寂寞邊冰霜凝巨壑風雨暗中田古
寺堪投晚塵龕閱紀年論交寒夜永清絕裊爐煙

伏蒙判院丈垂示用韻喜晴之句率爾奉酬

客枕終難穩歸來鼾息深曉雞回遠夢缺月挂空林冰
谷晨加帽晴窗晝解襟詩筒多妙語仍喜舊盟尋

登梅嶺

去路霜威勁歸程雪意深往還無幾日景物變千林曉
磴初移屐寒雲欲滿襟玉梅疎半落猶足慰幽尋

即事有懷寄彥輔仲宗二兄二首

一水方涵碧千林已變紅農收爭暖日老病怯高風徙
倚非無計心期莫與同向來歡會處離合太匆匆

聞說雙飛槩翩然下廣津江湖知子樂魚鳥諒情親淹
速須關命行藏不繫人三山雖好在惜取自由身

題祝生畫呈斐丈

近代丹青手心期良獨難夫君偏有思妙處却無端堂
上三湘遠人間五月寒空囊今有此不用一錢看
斗酒淋漓後顛狂不作難千峰俄紙上萬景忽毫端石
瘦岡巒古林深烟雨寒蒼茫無限意俗眼若為看

次秀野暑中二首

熹新自雲谷還家雲谷絕
頂四望雲山環數百里

劇暑愁難度清秋喜却回病隨庚伏盡尊向晚涼開臨
水看雲去鈎簾待月來勝遊驚昨夢曾上鬱蕭臺
絕境人難到惟堪樂此身泉吟青玉峽風度白綸巾獨
往寧無意長閒未有因雲山天賜履吾道豈全貧

家釀二首

銍艾無中熟歡謠闕屢豐但知愁髻白那復醉顏紅田
舍寒如此侯家事不同新醅撥浮蟻春滿夜堂中

聞道兵厨盛春泉響牕窮定知盈榼送不待叩門求沆

濯應難比茅柴祇自羞病身從法縛好客為公留

酒市二首

閒說崇安市家家麴米春樓頭邀上客花底覓南鄰詎
有當壚子應無折券人勸君渾莫問一酌便還醇

麗藻摘雲錦新章寫陟釐詩傳國風體興發酒家旗見
說難中聖遙知但啜醅盤餐雜鮭菜那有蟹螯持

登定王臺

寂寞番君後光華帝子來千年餘故國萬事只空臺日

月東西見湖山表裏開從知爽鳩樂莫作雍門哀

十三日晨起霜晴前言果驗再用敬夫定王臺
韻賦詩

北渚無新夢南山有舊臺端能成獨往未肯遽空回
磴滑新經雪林深不見梅急須乘霽色何必散銀杯

自方廣過高臺次敬夫韻

素雪留青壁蒼霞對赤城
我來陰壑晚人說夜燈明
貝葉無新得蒲人有舊盟
咄哉寧負汝安敢負吾生

贈上封諸老

夜宿上封寺
條然塵慮清
月明殘雪裏
泉溜隔窗聲
楮衲今如許
綈袍那復情
爐紅虛室煖
聊得話平生

胡丈廣仲與范伯崇自嶽市來同登絕頂舉酒
極談得聞比日講論之樂

我已中峰住
君從何處來
莫留巖底寺
徑上月邊臺
濁酒團圞坐
高談次第開
前賢渺安在
清醑寄餘哀

十六日下山各賦一篇仍疊和韻

絕頂來還晚寒窗睡達明連牀眇歸思三宿悵餘情雲
合山無路風回雪有聲嶽祇珍重意只此是將迎

十一月二十六日宿萍鄉西三十餘里黃花渡
口客舍稍明潔有宋亨伯題詩亦頗不俗因錄
而和之

鼎足爐邊坐陶然共一尊道心原自盛世味不須論安
穩三更睡清明一氣存雖無康樂句聊爾慰營魂

過豐城作

渺渺豐城縣回頭憶舊遊晴江羅遠樹宿莽亂中洲寶劍今龍甲神光尚斗牛他年還記得此夜一扁舟

舟中晚賦

長風一萬里披豁暮雲空極浦三年夢扁舟二子同離離浮遠樹杳杳沒孤鴻若問明朝事西山掩靄中

觀西山懷嶽麓以為莫能相上下也聊賦此云
風月平生意江湖自在身年華供轉徙眼界得清新試問西山雨何如湘水春悠然一長嘯妙絕兩無倫

安仁曉行

夙駕安仁道行行得自娛
荒山圍野闊遠樹出林孤
景晦長煙合天寒碧草枯
歸心懷往路極目向平蕪

十七日早霜晴觀日出霧中喜而成詩

斜月夜窗白肅霜朝氣清
長塗披素錦寒霧湧金鉦
已作三冬雨何妨十日晴
天公且相念莫遣暮雲生

再用前韻

久陰冬竟煖欲霽氣先清
田舍占煙火軍家候鼓鉦
風

霜千里肅天地一朝晴明日知何日陽春又發生

章巖

豁爾天開宇呀然夜不扃閒雲任棲宿密雨斷飄零破
屋僧常住高軒客屢經古今題寫處一半蘚文青

擇之寄示深卿倡和烏石南湖佳句輒次原韻
未識南湖景遙欣二子遊賞心并勝日妙語逼清秋賸
欲遺詩卷相將買釣舟微吟歸去晚杜若滿汀洲

有懷南軒老兄呈伯崇擇之二友

憶昔秋風裏尋盟湘水旁勝遊朝挽袂妙語夜連牀別
去多遺恨歸來識大方惟應微密處猶欲細商量

積雨芳菲暗新晴始豁然園林媚幽獨窗戶愜清妍晤

語心何遠

謂日與擇
之講論

書題意未宣

謂數收伯
崇近書

懸知今夜

月同夢舞雩邊

次韻擇之梧竹并呈季通

竹塢深深處檀欒遶舍青暑風成慘淡寒月助清冷客
去空塵榻詩來拓采櫺此君同一笑午夢頓能醒

永日長梧下清陰小院幽自憐風嫋嫋客賦雨濶濶作
別今千里相思欲九秋更憐同社友復此誤淹留

仙洲新亭熹名以畫寒紫微張公為書其額判
院劉丈乃出新句輒次高韻二首

聞說藤蘿外神龍舊所蟠擘開千丈峽寫盡一襟寒賞
寄三杯酒歸投六尺竿若無詩律好清絕不成歡

峭蒨非人境寒蟬夏已稠陽崖驚素雪午扇怯清秋共
說新亭好真堪妙墨留賞心元不厭仙夢肯來遊

與劉德明祝濟之胡子寬晚步偶成

雨罷寒逾勁，霜威正凜然。
不知荒徑濕，行到竹橋邊。
曠望情何極，徘徊意莫傳。
清波涵衆影，日落暗晴川。

次韻晝寒

行穿危磴盡，林表見孤亭。
澗瀉千尋白，峰回四面青。
塵襟元落落，風腋自泠泠。
一醉今何許，無心賦獨醒。

次判院丈清湍之什

明滅青羅帶，週遭碧玉環。
孤亭感陳迹，茂樹喜重攀。
爽

氣琴尊外泉聲枕簟間詩成無寫處絕壁蘚痕斑

和季通畫寒韻

萬壑爭流處千年樹石幽危亭因我作勝日為君留酒
笑紅裙醉詩慙雜珮酬尚嫌心境窄更約九垓遊

奉酬圭父茉莉之作

玉蕊琅玕樹天香知見薰露寒清透骨風定遠含芬爽
致銷煩暑高情謝曉雲遙憐河朔飲那得醉時聞

奉酬圭父白蓮之作

忽傳夔府句并送遠公蓮翠蓋臨風迴冰華浥露鮮舞
衣清縞袂倒景爛珠躔想象芙蓉闕冥冥絕世緣

公濟惠山疏并以佳篇來貺因次其韻

焯

靈草生何許風泉古澗傍褰裳勤采擷枝筍噉芳香冷
入元根閔春歸翠頰長遙知拈起處全體露真常

筍

新筍因君寄康廬入夢中丹元餘故宅翠竹尚餘風日

日來威鳳年年饌，籜龍猶嫌有蕪味。不似一源功。

廬山簡寂

觀道士陸修靜之所居。從遠法師蓮社之遊，賜號丹元先生。觀有甜苦筍，今所惠乃甜筍也。

宿雲際寺許順之將別以詩求教次韻

薄暮投花縣，聯車入翠微。長林生缺月，永夜照寒扉。
情語欣無數，離懷悵有違。勉哉強毅力，千里要同歸。

宿休菴用德功壁間韻贈陳道人

暮入千峰裏，寒棲一草菴。室連丹竈煖，厨引石泉甘。
塵慮紛難到，神光耿內含。非君有道氣，孤絕詎能堪。

和張彥輔白鹿洞之作

邃谷新華館風烟再吐吞
舊眠聞野鹿遺恨響驚猿

拾李

遺自此徙居少室
乃被徵故有此句

共賞忻同趣分攜愴別魂徘徊空日

夕無策駐行軒

次張彥輔西原之作

無處堪投迹。空山寄一椽。懸門窺絕壁。繚徑上層巔。檻
潤吞江浪。窗虛響谷泉。丹經閒自讀。不為學神仙。

次張彥輔卧龍之作

瀑水源何處高疑雲漢通瀉時垂練直落處古潭空客
寄詩能好龍蟠意自雄知君來峴首為我說隆中

次張彥輔棲賢之作

融冶何年事停杯莫問天祇今從痼疾疇昔似因緣傾
耳真三峽投文沕九淵蘭亭那得此猶足致羣賢

贈于盛二生

昔日豐城劍寒光射斗牛江山餘秀傑人物尚風流二
妙今安匹孤帆各倦遊還家問師友折節慕前修

閏月十一日月中坐彭蠡門喚船與諸人共載
泛湖至隄首回棹入西灣還分韻賦詩約來晚
復集詩不至者浮大白

解組無多日歸哉喜欲狂臨風成邂逅載月下滄浪酌
酒傳清影鳴橈擊素光他年隔千里此夜莫相忘

登廬峰二首

循磴躋危磴披雲得勝遊蓬茅增舊葺竹樹喜新稠夢
想三秋別徘徊十日留餘年端可料此地欲長休

佳友紛來集欣然會宿心風泉陪徙倚雲月共窺臨雅
唱情俱勝微言思獨深茲遊非逸豫邂逅得良箴

游密菴得空字

欲覓仙洲路須乘萬里風飲泉雲出岫卧嶺月流空永
夜渾無寐悲歌莫與同起來殘樹影清絕小樓東

和林擇之鳳凰山韻

木落髻鬟擁湖平妝鏡空荒亡餘舊事慘澹只悲風興
發千山裡詩成一笑中諸君莫惆悵吾道固當窮

次林擇之涼峰韻

解轡林間寺歸鴉晚欲盤望中嵐翠合愁外夕陽殘尊
酒何妨盡羈心且自寬無端滿窗月遙夜不勝寒

次韻陳休齋懷古堂

平昔塵編裏心期本自幽那堪舊泉石更作此追遊好
句看猶在遺忠愴已休亦知今日意不逐大江流

次公濟精舍韻

一室空山裏纖塵迥莫侵若非同臭味誰肯遠過臨健

策凌丹壑清詩動玉琴溪邊一回首平地足崎嶇

詠巖桂二首

亭亭巖下桂歲晚獨芬芳葉密千層綠花開萬點黃天
香生淨想雲影護仙妝誰識王孫意空吟招隱章

露浥黃金蘂風生碧玉枝千林向搖落此樹獨華滋木
末難同調籬邊不並時攀援香滿袖歎息共心期

放船二首

浩蕩清江水依微綠樹風解維春雨外弭櫂夕陽中江

草生新徑巖花點舊叢詩翁不愁思逸興莽何窮

疇昔清溪峽船頭戲彩翰十年空往事一夢記前灘陡

絕垂蒼壁澄虛列翠巒今宵詩卷裏重得縱遐觀

往年汎舟

此峽有水鳥數十翔集舟前舟至輒起若相導十餘里乃散

呂祖謙

題歸菴

雲壁開蒼峽風林卷翠濤諸松皆老大一嶂獨孤高發興雖公等尋幽許我曹秋光端可賦不是楚人騷

城樓

城峻先迎月，簾疎不隔風。
棋聲傳下界，雁影沒長空。
島嶼秋光裏，樓臺海氣中。
登臨故待晚，雨外夕陽紅。

張栻

和楊教授

客少從蒿長，居深懶戶開。
孤城歲云暮，瘦馬子能來。
長策憐葵向，新詩更雨催。
相看前日事，此首忍重回。

送少隱兄赴興元幕

邊塞連關隴
貔貅罷戰征
幕中須預計
堂上乃奇兵
漢水追長策
秦原憶舊耕
書生亦多事
慷慨試經行

和張晉彦遊嶽麓

齋舫凌烟浦
雲屏入畫圖
日烘花炫晝
風定水明湖
布穀催春種
提壺勸客沽
湘中無限景
賦詠繼三都

送臨武雷令

詔舉循良吏
時資撫字功
人情平易看
治道古今同
綠野新耕盛
潢池舊習空
便應君課最
名姓御屏中

喜雨呈安國

望歲民心切為霖帝力均
崇朝變炎暑舉目盡清新
坎連邨鼓熙熙萬室春
北窗涼枕簟安穩到閒人

過湘潭劉信叔舊居有感

北渚留行客東陵憶舊侯
蓮池半枯折風葉正颼颼
事業留千載英雄去一丘
平生許國志歲晚詎悠悠

上封有懷元晦

憶共朱夫子登臨冰雪中
劇談無俗調得句有新功
別

去雁橫浦重來月滿空遙憐今夕意清夢儻相同

題福巖

擲鉢峰前寺肩輿幾度來樓臺還舊觀杉檜撫新栽湘
水堂堂去秋山面面開徘徊千古思風壑有餘哀

由西嶺行後洞山路

西嶺更西路雲嵐最窈深水流千澗底樹合四時陰幽
絕無僧住間來有客吟山行三十里鐘磬忽傳音

過高臺寺

著屋懸崖畔開窗疊嶂秋半歌雲榭冷不斷石泉流茗
椀味能永竹風聲更幽平生版菴老得句似湯休

三月十日野步城南晚與吳伯承諸友飲裴臺
分韻得江字

春日煙沙岼禪房風竹窗有時傾綠酒隨處見清江世
路紛多轍吾生老此邦千林看不盡白鳥去雙雙

十四日陪黃仲秉渡湘飲嶽麓臺上分韻得長
字

支筇穿百級把酒問春光喬木依然在幽蘭祇自芳未
當湘水滿更覺橘洲長暝色猶回首天涯話故鄉

王長沙約飲縣圃梅花下分韻得梅字

平生佳絕處心事付江梅縣圃經年見芳樽薄暮開朗
吟空澈烈燒燭且徘徊未逐徵書去窮冬尚一來

謝胡掾惠詩

一見知心事旋觀慰月評慈祥漢循吏儒雅魯諸生莫
作周南歎終期冀北程新詩連夜讀梅影伴孤清

二月二十五日登裴臺坐上口占

朝來風雨好抱病亦登臨故國江山在荒城花柳深憂
時空百慮望遠只微吟春事如櫻筍幽盟可重尋

寄侯彥周

塞雁仍南去慙慙問來陽催科應獨拙理髮詎能長邑
古絃歌地年豐魚稻鄉婆娑還得否三徑未云荒

過長橋

西風吹短髮復此渡長橋木落波空濶亭孤影動搖排

卷四十一
徊念今昔領略到漁樵儻有山中隱憑誰為一招

多景樓

疇昔南徐地登臨北固樓平原迷故國滄海接江流木
落煙莎晚城孤鼓角秋寄言鷗鷺侶吾已具扁舟

金山

萬頃洪濤裏巍然閱古今雲煙三島接花木四時深亂
石維舟住西風倚檻吟朝宗知不斷淒切此時心

重陽前一日

九日明朝是清樽強自開蕭蕭疎雨暗滾滾大江來野
菊閒無數沙鷗靜不猜何須騎臺飲此興亦悠哉

新亭

風景自今古斯亭今是非絕憐江水去還有故山圍得
失同千慮成虧共一機所思惟謝傳不但勝淮淝

庚申過青草湖

已越重湖險張帆勝順流亂雲藏野寺橫網罟魚舟物
色湖南好風霜歲晚謀未知荒歉後得似向來不

默姪之官襄陽詩以送之

潦雨彌旬月予方念鞠窮子行何草草別語又惓惓漢
沔英靈在江山今昔同未須登峴首先合拜隆中

寄題周功父溪園三詠

嫣然亭

聞說亭花好居然似蜀鄉色深姿不俗香淡意能長高
燭留深夜輕陰護晚芳何心較桃李只擬答春光

溪亭

未識主人面先為溪上吟澄潭依近岸絕壁聳遙林
領略襟期遠登臨歲律深想當軒冕外三歎有餘音

雪亭

溪園平廣處雅稱雪中遊疎密看千變高低共一丘
寒知松節勁靜覺竹聲幽還有古人否當能著小舟

次陳擇之遊湖韻

落日遊魚上青林白鳥過稻香來隔岸巖影占清波
招隱何年賦尋幽此地多晚涼容縱棹聽我採菱歌

送但能之守潯州

循吏古猶少，嶺民今未蘇。
丁寧煩詔旨，推擇得吾徒。
根本誰深念，詩書計不迂。
惟應敷此意，豈但應時須。

送祖七姪西歸

故國非喬木，名家重典刑。
飄零念吾黨，寂寞撫遺經。
菽水知何病，芝蘭要滿庭。
汝歸應記取，為我話丁寧。

中春過陽亭

亭古危臨岸，林幽巧近城。
煙容隨雨住，花片著溪清。
春

事已如許客懷誰與傾
亭前兩好樹滿意欲敷榮

除夕登仲宣樓

懷土昔人志傷時此日心
長江霜潦淨故國暮煙深
訪古多遺恨憑欄更獨吟
細看前浦樹生意已堪尋

劉勝因自襄陽過予渚宮於其歸小詩贈別

骯髒寧多忤棲遲久倦遊
折肱諳世味袖手惜良籌
日月隆中晚風煙峴首愁
登臨應慷慨還解寄詩不

送曾裘父

交舊間何濶能來決日留還尋桂橘頌惜別仲宣樓探
古書盈屋憂時雪滿頭絕思黃閣老招隱意綢繆

中秋與僚佐登江陵郡城觀月

涼意今年早蟾光七澤多憑欄共懷古擁袂獨高歌風
物關山遠功名歲月過一樽聊復爾於此興如何

遊章華臺

楚國舊雄勝荒臺今是非平川留宿潦蕭寺掩斜暉木
落秋聲急天高雁影微淒涼無處問騎馬踏堤歸

用元晦定王臺韻

珍重南山路驅羸幾度來未登喬嶽頂空說妙高臺曉
霧層層斂奇峰面面開山間元自樂澤畔不須哀

和元晦後洞山口晚賦

石裂長藤瘦山圍野路深寒溪千古思喬木四時陰更
得尋幽侶何妨擁鼻吟笑看雲出岫誰似此無心

和擇之看雪

嶽背三冬雪真同不夜城野雲何晃蕩澗水助空明行

橐多新句青山有舊盟堂堂身世事渠謾說三生

和元晦十六日下山之韻

歸袂隨雲起籃輿趁雪明山僧苦留客世故却關情小
倚枯藤杖聊聽絕澗聲如何山下客一笑已來迎

和擇之韻

舊說峰頭寺真成杖履來却尋泥路滑更喜野雲堆寒
積三冬雪陽生九地雷城中幾親友為說看山回

王十朋

遊簫峰

蠟屐穿雲去山深喜路通人家煙色裏古寺水聲中金
澣星猶在丹成竈已空吹簫人不見臺下想仙風

送劉方叔兼簡全之

相見無多日依前又索居斷魂梅的皪過眼柳蕭疎足
馬來時路征鴻別後書君歸見溫叟為我問何如

宿慶善寺

剛被篙工誤遲留一日裝川塗隔浩渺燈火亂昏黃呼

僕回行李尋僧宿上方山前十里雪夜入夢魂香

剡溪舟中有感

又作遊吳客重登入越船西風桑葉岸細雨菊花天
旅思秋偏惡鄉心夜不眠錢唐江上月行見十分圓

遊東際

白石山峰下懸崖七際流穿雲來汨汨朝海去悠悠石

是誰家婦

俗有兩石峭立
俗呼石新婦

龍居第幾湫

俗云舊有龍

平生不行

險到此即回頭

上有六際
畏險不登

宿大冶縣

隔岸呼舟子湖山日欲曛人家數點火風物一川雲小
渡漁人占中流縣界分秋深山驛冷蕭瑟夜深聞

解纜南浦初泝長江江流出鄂渚漢陽兩山之
間雲靄橫之如一山然

解纜長江口回頭思黯然封疆一川隔煙靄兩州連水
鳥飛汭渚江豚躍傍船好風知幾葦送我上青天

元日

元日年年見天涯意故長詩篇示宗武春色酌瞿唐白
髮又新歲黃甘非故鄉弟兄團拜處歸去願成行

酒名
瞿唐

春

泊桐廬分水港

何處繫歸舟桐廬舊日遊港從分水出亭瞰合江流疊
嶂雲披絮遙天月吐鉤紛紛釣魚者無復見羊裘

塔子山

已過魯家洲猶瞻石首山水隨江繚繞山逐岸回環雨

泊蘆洲岸舟行晚照間貪看洞庭好不作沌中還

宿灌口

拂曉出楚塞中流望荆門江隨銅柱轉舟過虎牙奔鳥
度暮天濶魚翻秋水渾宜都轉盼處夜宿舊江邨

吳儆

題古巖舊嘗侍孫先生題名巖中二首

錄一首

覆簣一拳進嵌空百肘寬僧房因石室蟻穴夢槐安塵
路十年別松風六月寒淒涼舊題處不忍更重看

拾梧子

雞犬三家市蓬蒿一畝宮
春盤厭筍蕨秋子積梧桐
客夢五年過文盟千里同時清
臺省貴衮衮者諸公

晚步

水靜偏明眼山高不受塵
晴沙棲白鳥野渡集歸人
問字誰持酒行歌有負薪
娟娟孤月影獨覺向人新

弋陽道中

積雨今朝霽東臯晚日紅
人家深蔽樹野水濶浮空
久

客仍行役青春已過中嶺頭凝望處腸斷白雲東

王阮

題龍寺一首

傍石尋幽徑窮源得梵城塔光侵地發龍氣逼山清是
處堪吾老何年遂此生霜林知客意一夜戰秋聲

謝張安國相過

元戎驅小隊來赴野人期山靜傳呼遠風輕遊賞宜飛
蘿穿杖履芳草煥旌旗好借絲綸手雕鐫一小詩

次德和韻寄談李二丈

心在淮山下身行湘水中喜拋餘子去恨不故人同舊
隱勞征夢浮名任化工衡陽春漸暖終欲伴歸鴻

方信儒

題龍隱巖

石門元不鎖巖屋本無基九夏花猶在千年樹倒垂僧
閒方定起客到每歸遲甚欲眠蓬葉沿崖讀斷碑

薛季宣

江行即事

春信潮聲急
滔滔掩岸沙
客船離浦溆
漁笛起蒹葭
蕩槳水光碎
轉山帆影斜
篙工指煙樹
依約有人家

遊竹林善卷洞

萬古英臺面
雲泉响珮環
練衣歸洞府
香雨落人間
蝶舞疑山魄
花開想玉顏
幾如禪觀適
游鮒戲澄灣

王炎

用元韻答劉判官

邂逅章江上知從五馬車君才猶未用吾老更焉如間
濶思眉宇殷勤得手書喜聞衣綵樂入饌有江魚

即事

時寓清化

久輟囊中句時看肘後方有家如旅舍無事似僧房梅
白牆頭笑榴紅甕面香杖藜如可出溪上探春光

戴敏

西溪陳居士家

來訪西巖老家居水竹邨紫鱗遊境曲黃犢卧雲根自

昔好賓客相傳到子孫不行亭下路護筍別開門

後浦園廬

卜築成佳致幽棲樂聖時何如謝公墅略似習家池地
煖梅開早天寒酒熟遲催租人去後續得夜來詩

鄭公家

門牆多古意耕釣作生涯菽米散魚子蓮根拔虎牙弄
孫時擲果留客旋煎茶頗動詩人興滿園蕎麥花

陳造

山居

居深自少客兒輩省簷門日課午鐘飯生涯三畝園嗜
魚親蛇戶輟果及王孫不惜苔錢破橫縱步履痕
鳥息我亦倦行行取徑微石稜妨錯足藤蔓每鈎衣森
木各天籟連山同夕暉推門吟袖冷滿帶野風歸

圩上

小邨山影裏山脚水明沙春事初移柳人家未摘茶生
兒了門戶饌客有魚蝦笑我塵埃者奔馳鬢易華

金地寺

側徑崎嶇去飛蘿次第捫山橫欲無地路轉却逢邨竹
柏圍荒寺莓苔上繚垣殘僧不知客芋火老雲根

都梁五首

錄一首

犬吠蔥青裏人家竹徑深短籬循石礪老屋枕煙岑牛
瘠知春事鳩啼認晏陰豐年易為客杯酒慰幽尋

次瓜州

雲曠平山塔煙明老渚城客行判費日舟泊細論程間

水清兼濁潮天雨復晴未須歸有夢午枕愜涼生

高頭山

小駐緣雲脚居然睡眼醒楚天銜樹濶漢水挾山青蹀躞初忘倦巉巖已飽經川原方啗蔗不擬歎飄零

思歸

薄宦隨漂梗流光付迅湍家山蝶夢隔節物雁雲寒撫事頻回首微吟小凭欄多情但烏鵲時肯報平安

步西湖次韻徐南卿

載酒幽尋地，乘閒得再臨。
離黃啼曉霽，魏紫笑春深。
撫事揮犀管，他時夢鶴林。
心期更閒寂，物理付升沉。

幽事

日日營幽事，時時有好懷。
雨園殘竹粉，風砌落松釵。
伴蝶行花徑，聽蛙傍水涯。
窮通了無謂，不必更安排。

喜雪

陰宰弄精神，空中舞玉塵。
入簷燈影亂，折竹曉聲頻。
照幌光侵曙，欺梅雪壓春。
老夫貪快賞，呵凍拂烏巾。

曉起喜晴

老翁喜晴色屋角候晨曦圓影纔明隙方暉已鑑帷呼
童聊擁褐得火即舒眉盥櫛渾無事看山就小詩

葉樞相同游南明

聯騎上南明清談意自傾雲垂山掩翠風靜雨飛聲幽
壑藏舒景清溪漾晚晴從容共尊酒欲別正關情

漁舍

漁舍枕滄灣如游赤壁間

一名小赤壁

羨魚雖迹似匪釣却

心閒松古龍千尺溪清玉一環無人相伴醉沙觚弄潺
湲

陳傅良

月夜書懷

送客門初掩收書室更虛新篁高過瓦涼月下臨除婦
藥纔扶杖兒饒或饋魚今朝吾已過莫問夜何如

邨居

野衣農圃雜華髮弟兄同佚老便居僻貪閒喜命窮習

成杯酌少脫落語言工危坐看流景新萌又落紅

止齋即事

教子時開卷逢人強整襟甘貧知晚節多病得初心地
僻茭蓮好山低竹樹深寄聲同燕社明月又秋砧

姜夔

坐上和約齋

句入冰輪冷愁因玉宇開可知無此客猶恨不能杯好
句長城立寒鴉結陣來笙篴莫停手揉却斷腸回

答沈器之

江漢東流客乾坤不繫舟
玉琴虛素月金劍落清秋
野鹿知隨草飢鷹故上鞬
風流大堤曲一唱使人愁
涉遠身良苦登高望欲迷
試吟青玉案不似白銅鞮
露下秋蟲怨風高白馬嘶
槎頭有新味人在太湖西

黃幹

訪高僉判所居


遠樹分高下平洲半有無
短亭低密竹小艇隱寒蘆
轉

浪魚深入斜陽鴉亂呼自慙貴公子未老賦歸吳

御選宋詩卷四十

謹案第二頁前七行吾行正無定刊本正字訛在
定字下據誠齋集改

第二十三頁前四行飲泉雲出岫刊本飲訛餘據
朱子大全集改



總校官庶吉士臣侍朝
校對官檢討臣蕭九成
謄錄舉人臣李駟

欽定四庫全書薈要

集部

御選宋詩卷四十一

詳校官原任主事

臣李斯咏



欽定四庫全書薈要卷一萬八千三百四十八

兵部

御選宋詩卷四十一

五言律詩七

鞏豐

曉起甘蔗洲

曉起東風惡晴嵐忽變昏船隨山並失霧與水相吞鉦鼓遙知寨桑麻略辨邨雨來無準則容易濕柴門

林亦之

九日遊龍卧山留一夕明日值雨坐超上人房

偶題

野興更周遭應遲問大刀山房逢雨好人意與秋高多
謝烹鮮乳還令厭濁醪重來須累少款款聽蕭騷

秋試歸訪綠烟亭

竹徑紫紆去相逢情若何江從木杪見秋向菊邊多漫
有風濤想如今歲月過惟於交舊裏聽取碧雲歌

陳藻

題劉氏翠微亭

舊屋紅蕖外新亭綠樹傍
江晴孤棹見雨近衆山藏
學圃未成趣催詩何太忙
他年多橘柚此地一瀟湘

題清暉樓

茲樓名郡郭何處別林泉
一水遙通蜀千崖別挿天
鷗鷺晴舞雪桑柘月生烟
欲醉囊羞澀愁省兩度年

自題海漁亭

波濤生長處土地屬東隅
樹樹縣漁網邛邛呌鷓鴣
酒

旗孤嶼見書卷一山無欲起雞豚社因慙身業儒
屋舍高低住比鄰活計同簞簞嫌月白螳螂要霜紅吠
犬隨邨落賣魚成老翁地鹹耕種少海熟抵年豐

虞儔

和梅山道中小詩

城郭迎車騎溪山展畫圖歸鴉翻落照宿雁集寒蕪酒
裏傾肝膽吟邊識步趨佳人来底暮心俟碧雲蘇

樓鑰

東谷

舊說東柯谷茲來到此山樹深烟冉冉花落雨潺潺有
客禮師塔何人叩祖關天連秋水遠此意尚人間

中秋無月

涼意秋將半深期月影清昨宵雲點綴今夜雨縱橫睡
久何曾著更闌喜暫晴起來聊曠望終欠十分明

夜攜家登南渡橋

幾過長橋下清宵得意行風高江水急月上海潮生空

迴寒逾峭更深境過清扁舟難久駐轉施問歸程

楊簡

送章大著出守衡陽

濟濟衆賢俱徐徐五馬驅中司親雁序南岳佩魚符吳
楚從今異參辰幸小殊他時羣玉聚相與話踟躕

葉適

雪後思遠樓曉望

臘盡凍初合風花江欲平急從高處賞已向歲前晴莫

與鬢爭白試將身比清樓頭接遠岫歷歷正分明

贈勝上人

近日能吟者黃巖說勝師語生兼老筆體重帶幽姿遺
臘冰千箸勾春柳一絲方山最高頂不擬到茅茨

送包通判兼寄滕季度

風雨逍遙地衙排印簾新鈿車分路闊寶瑟聽歌頻燈
市曉侵月花田晚占春却過張翰宅方信有閒人

贈盧次夔

家住東郊深能詩人共尋冰
拔間道錦玉軫斷文琴城
漏宵添滴窓花晝減陰
新涼白頭句清甚費悲吟

西山
一作陳墳

對面吳橋港西山第一家
有林皆橘樹無水不荷花
竹外晴垂釣松間雨試茶
更瞻東挂綠空翠落朝霞

高似孫

答李才翁

素意杳難尋殘壚屬晚陰
花知西洛事雁叫北人心
客

共艱難盡詩隨老大深金陵書不到消息又沉沉

裴萬頃

雨後

秋事雨已畢秋容晴為妍新香浮櫬稭餘潤溢潺湲機杼蛩聲裏犁鋤鷺影邊吾生亦何幸田里又豐年

別敬叔

筆硯君無間冰霜歲又除諸生得模範六藝共耕鋤松菊淵明宅蓬蒿仲蔚居相望倘相憶時寄數行書

次胡伯仁韻

山長飛鳥急江闊去帆微
唱晚幾漁笛憑高一釣磯
從君濯冰雪滿袖得珠璣
三歎不能已歸來吟夕暉

劉宰

雲邊偶成

月下浮舟去雲邊曳杖行
物華隨節換人意與秋清小
圃疏逾潤荒叢菊向榮幽尋元自好底用絆浮名

天台道中

花重朝霏散鳥啼春意深風光自流轉行役負登臨澗
水流新綠山雲掩夕陰病容兼白髻漂泊此時心

儀真雍生見和因再用韻兼懷儀真

北觀憑欄望西橋信馬行朋從有名勝風物正淒清亂
定人烟改春回草木榮遙憐舊遊處壞壁暗題名

聞余
梅園

題壁
尚存

苦雨遣興

老去身何有時危念苦深朝陽方借暖宿靄又成陰梁

楚安策少關河去鳥沉誰歌出塞曲慷慨百年心

崔與之

送魏秘書赴召

國論參稽定人材護養成古來同此恨老去向誰傾太
白雲猶濕瞿塘水正生挂帆干斗極屬耳鳳凰鳴

送夔門丁帥赴召

議論方前席功名早上坡去帆底蔓水遺愛竹枝歌同
志晨星少孤愁暮雨多倚風窮望眼碧色渺平莎

和子純韻

橋下水如箭驚奔萬古號溪毛翻碧帶石蘚襯銀濤天
外千層秀雲低數尺高垂垂興偏惡蓬髻為詩搔

送客剡溪

送客山陰路春風散馬蹄縱觀神禹穴深去子猷溪嫩
草綠于染珍禽嬌已啼去程千萬里步步有雲梯

呂聲之

和王子寬韻

綠蔭千重竹清流一帶溪子真耕谷口楊震講關西手
摘星辰近名登泰華齊古來公相業誰不起鋤犁

汪莘

開禧元年四月自中都挈家還鄉寓居城南十
二月遷居柳溪上其夜大雪初一日蓋宰來訪
約過縣齋為一日款深夜而歸賦此

茅屋凍將壓柴扉寒不開交朋幾竿竹兄弟數枝梅渡
口月初出沙頭人正迴客居殊自在歲事亦相催

築室深山裏開門古澗邊月高猿子叫日晏虎兒眠帶
雪挑黃菜敲冰取碧泉不知居士樂空受俗人憐

陳淳

西征黃蓮坑遇雪

自入黃蓮北風嚴雪又加滿山羅玉樹遍地錯瓊花滿
灑姿無類虛名質不華瘴眸為一洗驚覺若仙家

楊長孺

一滴泉

法眼三泓井曹溪一滴泉經秋杜宇血遺老徑山禪衲
子非常釋叢林別是天方諸多少淚分灑汝江邊

杜旃

九日懷陳舍人

白髮江湖暗青燈几席涼窮途幾半百佳節又重陽命
也吾何奈天乎孰可量元龍樓百尺猶足慰行藏

岳珂

葆清值雨

積雨將旬浹都無一日晴
簷寒多雀噪路滑少人行
雲氣連山暗霜威徹骨清
更憐敲枕處終夕聽泉聲

松竹鎖靈宅塵埃了不侵
洞龍隨劒映檻鶴識琴心
路指三峰近山通一徑深
壁間少年字陳跡不堪尋

午睡

東日平明際北牕高卧時
五經方坦腹百慮且伸眉
蕉覆從疑鹿槐安更獵龜
覺來還一莞七椀玉川詩

綿羊

褥毛吹朔雪細肋卧晴沙曉牧尾搖扇春遊項引車漣
流便逐草酪膩正需茶日夕歸棲處因風想塞笳

山中奉寄通判楊宗博

多病山中客無人傍酒罇與猿分橡子為鹿長禾孫白
晝雲歸屋黃昏雨打門忽懷楊別駕煙靄隔重閭

宿溪聲閣望香爐峰

閱歷烟巖古琮琤雪澗橫海潮秋八月山雨夜三更肯
作隨流想難忘漱石情壯懷徒激烈聊復以詩鳴

三江口過舟時方四鼓

櫂鷁收金柅，釵蟲綴玉缸。
地鄰今七澤，名襲古三江。
岷漾雖分派，荆揚却異邦。
晨光猶未發，早認白鷗雙。

碧雲亭晚眺

閒步碧雲亭，寒郊弄晚晴。
牛羊分溟色，禽鳥有春聲。
城柳風猶勁，溪梅冰共清。
屋梁正殘照，西望憶長庚。
歲華方冉冉，耕畝自閒閒。
日落青楓浦，雲平白苧山。
夜城嚴警柝，昏鼓動層關。
風露汀洲冷，鷺鷥自往還。

劉仙倫

過嘉興

惆悵嘉興路三年幾度經航船連夜發更鼓隔城聽落
月低烟樹秋風冷露螢客懷容易感宜醉不宜醒

寄朱濟仲

家在三千里人來天盡頭角聲連夜月草色帶邊秋妻
子仍多病音書缺寄郵歸心與寒雁先已過瓜洲

趙師秀

桐柏觀

山深地忽平縹緲見殊庭
瀑近春風濕松多曉日青
石壇遺鶴羽粉壁剝龍形
道士王靈寶輕強滿百齡

縉雲縣宿

親知因別久具酒勞經過
古邑居人少春寒入夜多
雨香仙地藥燭動石橋
波稍覺離家遠鄉音一半訛

進賢道中

半月逢梅雨初晴客意消
鶯聲臨野水松影卧新苗
少

憩休輿卒間行過板橋平生無飲分空媿酒旗招

簡同行翁靈舒

久晴灘磧衆舟楫後先行經日不相見與君如各程水
禽多雪色野笛忽秋聲必有新成句溪流合讓清

秋色

幽人愛秋色祇為屬吟情一片葉初落數聯詩已清瘦
便藤杖細涼覺葛衣輕門外蕭蕭徑今年菊自生

靈山閣見二徐舊題

一面見溪水三邊皆翠微
晚來虛檻外秋近白雲飛
重至恰身老同吟感客非
靈山自如畫依舊隔斜暉

秋屏作

凡有闌干處秋來徧徃還
就中惟此地全得見西山
雁落遙沙小人登廢壘間
因憐一州景皆在夕陽間

劉隱君山居

嫌在城中住全家入翠微
開松通月過接竹引泉歸
慮淡頭無白詩清貌不肥
必無車馬至猶掩向巖扉

巖居僧

開扉在石層盡日少人登
一鳥過寒木數花搖翠藤
茗煎冰下水香炷佛前燈
吾亦逃名者何因似此僧

壕上

遠近人家住過橋路盡通
野田行瘦馬淺渚聚羣鴻
地靜微泉響天寒落日紅
若非身作吏不道是城中

月夜懷徐照

月色一庭深迢遙千里心
湘江連底見秋客與誰吟
寒

入吹城角光凝宿竹禽亦知同不寢難得夢相尋

送倪道士之廬山

近方辭地肺本自住天台有鶴相同出無雲作伴回道
房隨處借詩板逐時開又說廬山去間看瀑布來

德安道中

餐餘行數步稍覺一身和蠶月人家閉春山瀑布多鶯
啼聲出樹花落片隨波前路東林近慚因捧檄過

雁蕩寶冠寺

行向石欄立清寒不可云流來橋下水半是洞中雲欲
住逢年盡因吟過夜分蕩陰當絕頂一雁未曾聞

贈約老

一徑入深竹數楹臨古溝更無人共住極喜客來遊白
髮長垂領新茶綠滿甌自言門外寺皆是老僧修

翠巖寺

石巖看不見翠色自重重春雨生松葉山風响鐵鐘碑
頑工費墨草嫩綠添茸住院吳僧老相迎憶舊逢

送徐道暉遊湘水

春盡雨霏霏春寒猶在衣人尋香草去雁背遠峰歸
瀟水添湘閣唐碑入宋稀應知名與姓題寫遍巖扉

會景軒

此中非一景欲狀固難名江近秋陰早山多曉氣清
斷雲分樹泊飢鶴下田行別擬深更至虛空看月明

大慈道

青苔生滿路人迹至應稀小寺鳴鐘晚深林透日微
野

花春後發山鳥澗中飛或有相逢者多因採藥歸

葛翁小閣

樹色對疎櫺橫陳一片清微風楊葉下斜日竹梢明此
老無塵事雙妹亦道情客來憐素壁題句不題名

柳下書齋

轉曲認幽棲齋名壁上題柳遮船步水草出瓦溝泥養
靜拋書冊消閒倚杖藜誰知鳳城外宛是武陵溪

龜峰寺

石路入青蓮來遊出偶然峰高秋月射巖裂野烟穿螢
冷粘樓上僧間坐井邊虛堂留一宿宛似雁山眠

嚴州瀟灑亭

高榭出禪關人家向下看千峰春隔霧數里夜聞灘偶
至因成宿前遊亦值寒州人多有詠何不見方干

冷泉夜坐

衆境碧沉沉前峰月正臨樓鐘晴聽響池水夜觀深清
淨非人世虛空見佛心却尋來處宿風起古松林

翁卷

晚秋送徐璣赴龍溪丞因過泉南舊里

卷中風雅句名匠亦難如遠邑親微祿他鄉過舊廬程途多見菊行李半擔書未信文明代無人薦子虛

寄遠人

秋氣日淒清秋衣紉未成在家猶不樂行路若為情幾處好山色暮天羣雁聲分明相憶夢夜夜出江城

寄趙靈秀

千山落葉深高樹不藏禽遊子在何處故人勞此心閒
燈妨遠夢寒雨亂愁吟僧與曾相約花時共一尋

即事言懷

賦得拙疎性合令蹤跡賒相親惟野客所論是詩家聽
雨眠僧屋看雲立釣槎秋來有新句多半為黃花

寄沈洞主

想當清夜醺帶月叩仙鐘指上雷霆訣菴前虎豹蹤藥
收陽地草新採故枝松擬即尋師去茅峰疊幾重

太平山讀書奉寄城間諸友

寥寥鐘磬音永日在空林多見僧家事深便靜者心虛
庭雲片泊側徑石根侵此去城間遠君應懶出尋

送趙嗣勲

休思孤嶼峰且往看吳中一片太湖色遠涵秋氣空藕
塘南北棹蘆港去來鴻入幕多僚屬惟君事不同

題薛景石瓜廬

卜得無塵地栽花仍結廬雖然親隴畝還不離琴書洲

煖烟藏樹波寒月照魚東陵人已遠新興復何如

寄葛天民

常日已清癯那兼疾未除傳來五字好吟了半年餘鐵
柱仙人觀梅花處士廬江湖正相隔歲晚更愁予

題竹

偶種得成陰脩脩過別林月寒雙鵲睡風靜一蟬吟映
地添苔碧臨池覺水深貧居來客少賴爾慰人心

送徐靈囿永州司理

君向零陵日分攜又雪天地遙行幾郡官小度三年蘭芷芳條潔瀟湘翠色連從來苦吟思歸賦若多篇

中秋步月

幽興苦相引水邊行復行不知今夜月曾動幾人情光逼流螢斷寒侵宿鳥驚欲歸猶未忍清露滴三更

書隱者所居

百事已無機空林不掩扉蜂沾朝露出鶴帶晚雲歸石老苔為貌松寒薜作衣山翁與漁父相過轉依依

寄山友徐靈暉

若非殊俗好那肯愛幽居深徑無來客空山自讀書樹
蟬經雨少門柳望秋疎相憶何時去閒園共爾鋤

處州蒼嶺

步步躡飛雲初疑夢裏身邨雞數聲遠山舍幾家鄰不
雨溪長急非春樹亦新自從開此嶺便有客行人

即事

省飲不成醉牢愁將奈何晚烟雲半雜春雪雨相和巷

濕人行少空寒雁叫多凭欄思無極懷古漫悲歌

京口即事

長江當下流鐵甕此為州前代多名跡問人欲遍遊夕
陽波上寺明月戍邊樓一曲漁家笛生子無限愁

宿寺

一宿此禪宮身同落髮翁深窓難得月老屋易生風燈
冷紗光淡香殘印篆空獨憐吟思苦妨却夢西東

南澗尋韓仲止不遇

樹樹有佳色山蟬不住吟
掬來南澗水清若主人心
屋上雲飛冷籬根蘚積深
留詩在巖壁明日更相尋

能仁寺

芙蓉峰入天寺與此峰連
得見是冬月要來從昔年
寒潭盛塔影古木帶厨烟
偶值高僧出禪林坐默然

石門菴

山到極深處石門為地名
嵐蒸空寺壞雪壓小菴清
果落羣猿拾林昏獨虎行
一僧何所得高坐若無情

寶冠寺

山多猿鳥羣永日絕囂氛一澗水流出幾房僧共聞挂
筇黏落葉拂石動寒雲誰昔來營此尋碑看記文

初晴道中

初晴殘濕在衆樹碧光鮮幽鷺窺泉立閒童跨犢眠依
山知有寺過水恨無船石路是誰作姓名巖上鐫

贈孫李蕃

立談飛絮中相遇在吳宮以我為生拙憐君失計同醉

酣花落月吟苦竹搖風自作廬山記幽竒欲遍窮

送人遊天台

暫遊行李少幾日到天台船帶落潮發月從前浦來花
源香不斷藥地綠成堆莫學他劉阮經年忘却回

春日和刘明遠

不奈滴簷聲風回昨夜晴一堦春草碧幾片落花輕知
分貧堪樂無營夢亦清看君話幽隱如我願逃名

送薛子舒赴華亭船官

君到雲間日應分二陸名縣圖山色少井味海潮并剡
局三年卽春風半月程野人因買鶴曾向此中行

徐照

送翁誠之

又作巴陵縣南州舊有聲未憑湘水綠能似長官清笛
冷君山月帆輕夏浦晴五言多好句顏杜減詩名

宿翁靈舒幽居期趙紫芝不至

江城過一宿秋氣入宵濃蛩響移砧石螢光出瓦松月

遲將近曉角盡即聞鐘人起行庭際思君恨幾重

贈江心寺欽上人

客至啟幽戶筍鞋行曲廊潮侵坐禪石雨潤讀經香古
硯傳人遠新篁過塔長城中如火熱此地獨清涼

途中

隻影微陽外青山自鬱盤未經千里遠欲寄一書難
碣苔侵字魚塘水過欄西風吹樹葉不問客衣單

題桃花夫人廟

一樹桃花發桃花即是君空祠臨野水何處覓行雲事
迹樵人說爐香過客焚雨添碑上蘚難讀古詩文

懷如順上人

西湖湖上寺一別二三年舊住房長閉新栽樹已圓空
多相憶夢不得寄來篇喜見鄰僧說歸期是臘前

衰柳

風吹無一葉不復翠成窠枝脆經霜氣根空入水波寒
棲江鷺早暗出野螢多廢苑荒堤外人嗟舊跡過

鷺鷥

一點白如雪頂黏絲數莖沙邊行有跡
空外過無聲高柳巢方穩危難立不驚
每省間意思漁父是前生

山中即事

著屐上崔嵬呼兒注瓦杯千岑經雨後
一雁帶秋來野艇乘潮發山園逐主開
餘生落樵牧門巷少塵埃

石門瀑布

一派從天下曾經李白看千年流不盡
六月地長寒灑

木跳微沫衝崖作怒湍人言深碧處常有老龍盤

漁家

阿翁年紀老生計在綸絲野水無人占扁舟逐處移數
鱗新柳串一笛小兒吹有酒全家醉公卿要識誰

題鄴林

祇為登山遠當門疊石為人來嗟故跡景勝入名詩立
鶴高過檻敬花半在池百年庭際木新長挂冠枝

雁

今春北歸雁秋至又南征
冷避燕關雪暖逢湘水晴
連行衝燒斷並食雜鷗行
沙上無繒弋相呼一夜鳴

題薛景石瓜廬

何地有瓜廬平湖四畝餘
自鋤畦上草不放手巾書
人遠來求字童間去釣魚
山民山上住却羨水邊居

題翁卷山居二首

十年前有約今却在城居
羨爾能攜子深山自結廬
引泉移岼石栽藥就園蔬
見說高林外樵人聽讀書

空山無一人君此寄閒身水上花來遠風中葉動頻蟲
行黏壁字茶煮落巢薪若有高人至何妨不裹巾

題丁少瞻林園

州分低嶺外來向此園行路改初栽樹堂成未有名藥
苗如草長巖溜入池清欲識懷君意時聞鶴一鳴

題李商叟半邨壁

一徑蒼苔合連年不出門風高松有韻溪滿石無痕不
自知名重令人覺道尊更憂徵詔至移室向深邨

徐璣

投楊誠齋

名高身又貴自住小邨深
清得門如水貧惟帶有金
養生非藥餌常語是規箴
四海惟儒者相逢問信音

江亭晚眺

問得梅花信寒林動晚聲
雨來山漸遠潮去水還清
寥落尋新句歡娛解宿酲
相攜歸路滑燈火近孤城

同友人登翠麓亭

緩行循翠麓凝睇俯清灣舟楫蘆花外江山夕照間天
寒雖日短歲晚亦身閒高樹梅初發與君相共攀

冬日書懷

門庭黃葉滿園樹盡玲瓏寒水終朝碧霜天向晚紅
蔬餐如野寺茅舍近溪翁非是分囂寂由來趣不同

黃碧

黃碧平沙岼陂塘柳色春水清知酒好山瘦識民貧
雞犬田家靜桑麻歲事新相逢行路客半是永嘉人

西征有寄翁趙徐三友

窮冬逆旅身薄宦此艱辛渡水添愁思看山憶故人煙
生村落晚雨過竹松新昨夜還鄉夢逢君苦未真

晨起

晨起風吹面朝晴野霧收高峰多遠見淺水少平流世
事非難了塵勞獨未休今年看髣髴已變一莖秋

送趙靈秀赴筠州幕予亦將之湖外

郡以竹為名因知此地清溪來城下綠山到市邊平入

幕非無客能文必有聲江湖共遊宦相望若為情

泊舟呈靈暉

泊舟風又起繫纜野桐林月在楚天碧春來湘水深
官貧思近闕地遠動愁心所喜同舟者清羸亦好吟

憑高

憑高散幽策綠草滿春坡楚野無林木湘山似水波
客懷隨地改詩思出門多尚有溪西寺斜陽未得過

宿寺

古木山邊寺深松徑底風獨吟侵夜半枯坐雜禪中殿
淨燈光小經殘磬韻空不知清遠夢啼鳥在林東

孤坐呈客

晨起猶孤坐餅泉待煮茶寒烟添竹色疎雪亂梅花獨
喜忘時事誰知改歲華多君能過此仁里似仙家

送翁巴陵

曾識巴陵道重攜印綬過地偏無會計俗厚有絃歌官
况湘流碧詩情楚岫多梅花送征棹萬里接陽和

次韻劉明遠移居

恬淡安身易，新家似舊居。
徑涼行落葉，池淨數遊魚。
詩得唐人句，碑臨晉代書。
半生惟此樂，同輩必無如。

山居

柳竹藏花塢，茅茨接草池。
開門驚燕子，汲水得魚兒。
地僻春猶靜，人間日自遲。
山禽啼忽住，飛起又相隨。

夏日懷詩友

流水階除靜，孤眠得自由。
月生林欲曉，雨過夜如秋。
遠

憶荷花浦誰吟杜若洲良宵恐無夢有夢即俱遊

登信州靈山閣跨鶴臺

清遊吾有分渾似昔曾來野屋憑高住青山到水回欲
省靈岫遠須待曉雲開漸漸生愁思鄉心上古臺

夏夜同靈暉有作奉寄趙翁二友

齋居惟少睡露坐得論文涼夜如清水明河似白雲宿
禽翻樹覺幽磬渡溪聞欲識他鄉思斯時共憶君

書翁卷詩集後

五字極難精如君合有名磨礱雙髻改收拾一編成泉
落秋巖潔花開野徑清漸多來學者體法似玄英

檄逢寄翁靈舒

聞道長溪令相留一館閒便令全近舍尚隔幾重山為
旅春郊外懷人夜雨間年來疎覽鏡怕見減朱顏

秋夕懷趙師秀

冷落生愁思衰懷得句稀如何秋夜雨不念故人歸蛩
響砌尤靜雲疎月上微惟憐籬下菊漸漸可相依

送岳州蔣節推

湘水知幾派到湖相合流
烟深雲夢曉風靜岳陽秋
送子方行役令予憶舊遊
文書時正省賦詠可登樓

初夏遊謝公巖

又取紗衣換天時起細風
清陰花落後長日鳥啼中
水國乘舟樂巖扉有路通州
民多到此猶自憶髯公

溪上

十日清溪上新春細雨天
綠波隨棹起白鳥望舟眠
夢

秀初如草雲濃半是烟却愁山路險明日捨溪船

中川別舍弟

中川人語別南國夜何其江迥風來急山低月落遲纜
從前浦遠角在古城吹五畝耕鋤地何當手共犁

湘水

湘水幾千里平流少激湍數家分市井列石起峰巒豈
是昔曾到猶疑畫上看吟詩身漸老向此作微官

送徐照先回江右

骨體先如鶴離家歲已周欲知詩思遠曾共楚鄉遊窮
達身將老分攜菊正秋江西南省舊友歸計少遲留

題陳待制湖庄

園無三畝地四面水連天行向樓高處却如身在船野
花春渚外山色海雲邊一任人來往茲懷亦浩然

曉

詩髻曉星星霜天似水清風當窗眼入冰向硯池生已
瘦梅花影猶乾竹葉聲夜來天地潔惟是月華明

春日遊張提舉園池

西野芳菲路春風正可尋
山城依曲渚古渡入修林
長日多飛絮遊人愛綠陰
晚來歌吹起惟覺畫堂深

題石門洞

瀑水東南冠廬山未足論
飛來長似雨流處不知源
洞裏龍為宅溪邊石作門
修行謝康樂菴有故基存

送瑞州張知錄

歲暮不惜別君行是宦遊
江西多野水湖上正高秋
舊

友曾過處新題必共留官間可尋訪竹徑最深幽

薛師石

瓜廬

近來有新趣買得薛能園疎壤延瓜蔓深鋤去草根花
時常載酒月夜正開門最識田家樂辛勤更不言

寄蔡任

不見三百日問君消息多身閒詩有味水靜月無波琴
裏懷孤竹書中寄永和遙憐一江隔何計得相過



送張直翁之筠陽

時平民事少詩句定能清
況作江西去故教秋水生
山花香淡薄湘水恨分明
朝士多知爾慈溪舊有聲

和梅氏西澗韻

此處宜新月開門必向西
近江潮有信初種樹猶低
何日尋梅隱移船繫柳堤
詩篇滿牕戶留壁待余題

送王成叟先生訪丁子植

老嬾無拘檢一年身耐貧
還思溫嶺去別我苦吟人
柳

色行三日霽風浴暮春舊時同學友迎拜綠袍新

送蔣肖韓

岳陽有仙跡君去頗相宜已料官閒日多吟湘水詩高
風琴斷裂白月酒漣漪無意求人薦惟應我自知

宿瞿溪

船泊溪西岼人家見晚春疎星寒有雁村寺野無鐘竹
徑通新店茅柴暖病容農夫不相識問我欲何從

送項季約入成都幕

閣書入兵幕束袖學戎裝峽峭艤侵月秋清猿嘯霜迂
程看陣磧到處宿詩堂若比仲宣樂輸君髮未蒼

送高郵周主簿兼呈陳居端

遶縣重湖色難同主簿清雖云古郵置不似近邊城月
落淮田闊風晴隋柳輕鄉人在曹職相得為詩情

趙蕃

雨望偶題

漠漠青山雨霏霏白露烟詩材來遠近畫幅及中邊流

落雖天外登臨在目前
浮生才幾日此地欲三年

嚴先輩詩送紅梅次韻

畫道梅花白能紅又一奇
渾疑丹換骨不是酒侵肌
看此敷腴色思儂少壯時
盛年雖不再猶擬歲寒知

螢火

渾忘生朽質直擬慕光輝
鮮燭書幃靜能添列宿
稀當風方自表帶雨忽成微
變滅多無理榮枯會一歸

韓琥

雨多極涼冷

焉知三伏雨已作九秋風木葉涼應脫禾苗潤必豐地
偏山吐月橋斷水浮空雞犬鄰家外魚蝦小市中

徐文卿

雨後到南山邨家

衝雨入窮山山民猶閉關橘垂茅屋畔梅映竹籬間奇
石倚林立清泉遶舍灣吾思隱此地凝立未知還

周文璞

鶴廟

櫻桃花覆地古廟自青春
帳裏還丹使山中採藥人
風林高黑虎雲路引斑麟
欲見神君面連朝禮北辰

秋日孤山道院

孤山有何好修竹隱樓居
人在秋雲杪香凝午醺餘
芳林多落果靈沼少驚魚
歸棹聞歌詠猶如學步虛

歸別墅

幽棲久不到猿鶴擅藤蘿
叢篠生將遍流泉咽更多
鄰

翁新釀熟野寺暮鐘和亦有經行者來觀倚杖歌

雨宿山中

留連如有情蕙帳極空明晚粥知泉味昏鐘度雨聲稍
容鄰叟睡莫放曉猿驚剗剗苔蘚應當寫姓名

高翥

春日即事

人間間日月春日乍晴陰半夜雨聲急一谿流水深鳥
啼花自發詩就客能吟短策西湖路幽芳信意尋

春日湖上

乘興行新路凝情獨老翁
馬蹄春草上人影夕陽中
飛絮沿河白殘花染浪紅
晚歸雲氣合雙槳破空濛

古廟

古廟依喬木開門對淺沙
短籬紅槿樹深徑碧苔花
屋破香烟濕庭空日脚斜
山寒無賽鼓鳴噪集神鴉

渡錢塘

小立晴江上潮生落照邊
晚花低映水春草暗迷煙
燕

子飛官驛鷗羣引客船
關情南浦別相對獨依然

曹娥浦泊舟

夜宿曹娥浦停舟是幾更
聞鐘知寺近聽舫信潮生
風向沙頭起天從柁尾明
夢回無意緒兩岬杜鵑聲

度仙霞嶺

盡日度仙霞西風吹髣髴
華乍寒拋白苧臨晚見黃
花山險全無路溪晴半是
沙嶺雲無宿處斜日帶棲
鴉

富陽縣秋日

古井梧桐老平山擺極收雞豚百里社砧杵十分秋乾
鵲催歸興寒蟬喚客愁銜杯憶霜蟹沙尾莫停舟

曉行

跨馬登長路聞雞度遠關水光斜漾月雲影倒蘼山人
跡霜橋外禽聲烟樹間自慙林下客清夢未曾還

卜居

結屋離黃道開門對白沙一莊千古月三徑四時花客
至旋沽酒身閒自煮茶相聞蟲鳥外不復聽喧譁

葛天民

即事

春漲侵高岼春雲裏亂山倒遷楊柳活斜倚桔槔閑世
味老方淡花時晴最慳東風嗔懶動故故撼柴關

重訪白石

長安惟白石與我最相關每到難逢面翻思懶下山欲
歸愁路遠小住待君還盡日省幽桂無人似我閒

湖上夜歸

陌上紅塵歇湖中翠靄生
定鐘山寺迴新月夜船清蛙
亂鳴方急鷗閒睡不驚兒曹
知我到認得打門聲

聞鳩

蟄動猶寒在鳩鳴恰睡餘
素傳鷹羽化多占鵲巢居報
我晴何用憐渠拙自如年年
偏感處風急杏花初

迎燕

咫尺春三月尋常百姓家
為迎新燕入不下舊簾遮翅
濕沾微雨泥香帶落花
巢成雛長大相伴過年華

訪端叔提幹

月赴湖頭上山隨施尾行大江中夜滿雙櫓半空鳴雁
冷來無幾鷗清睡不成平生師友地此夕最關情

秋日湖西間泛

雨洗千峰曉波涵萬頃秋菱花開古鏡蓮葉度輕舟思
遠人誰識身閒世不收望中時得句倚櫂雜吳謳

湖邨晚興

殘霞伴孤鶩晚燒雜斜暉秋向詩中出人從畫裏歸柳

塘雙槳急，苑舍一燈微。
小艇穿籬入，蒲蓬正擁扉。

宿裴菴

一徑松杉迥成陰，見日稀。
山晴僧盡出，風暖燕交飛。
結子花拋樹，攔人犬護扉。
閒看山月上，清坐更添衣。

清明前四日泛湖

繞岸堆青嶂，遊船滿綠波。
樓臺臨水近，楊柳占春多。
老去誰同調，尊前且放歌。
韶華能幾日，隨棹已新荷。

葉紹翁

聞頂山徐道人改卜

先生新卜宅只許白雲知
野蜜和蜂割巖花帶蝶移
坐
諳苔石穩醉忘水橋危
屋後寒梅發因風寄一枝

秋日游龍井

引道煩雙鶴攜囊倩一童
竹光杯影裏人語水聲中
不
雨雲常濕無霜葉自紅
我來何所事端為聽松風

葛天民隱居

種竹成新列移蘭即舊陰
老鐺猶有耳古柳已無心得

句添杯滿貪爐到夜深
篝燈聊檢校春水沒衣砧

寓居

雲補青山缺琴消白日長
鷗從雨外沒蛇入樹間藏
客久衣常黑童鬢髮半黃
營多鄰舍少此意自淒涼

賦葛天民栽葦

葉礙漁舟入叢分水國寬
低回藏鷺渚髣髴釣魚竿
蕩戶和萍送溪翁當竹看
所憐如許節不耐雪霜寒

田舍小憩

犬馴迎且吠兒小笑還啼櫻熟施魚網桑空卧竹梯枯
枝禽啄折野草鹿眠低屋後登山路牛欄更向西

幽居書事

牕開雙佛塔水遶數漁家酒剩沾鄰里時平買釣車童
閒惟伴鶴樹老自成槎枕上關心事侵晨埽落花

和葛天民呈吳韜仲韻賦其庭館所有

江遠潮痕細城回路勢斜竹行穿砌筍風墮過牆花篆
葉蟲留字銜泥燕理家主入清到骨相對只杯茶

題山間老友壁

山間雖寂靜未得事全無鋤地留莎草添泉養石蒲
庭除風自埽身世月同孤老去知禪味松間試結趺

寄湖上黃教佑甫

門幽緣近寺官冷未成家樓借山為障風吹水作花
詩方酬北碕經又節南華聞說新雛鳳賓來解喚茶

過崇德

野塍泉自注斷岬柳空存雨霽雲間塔船過犬吠邨柴

扉斜著水草徑別通門翻羨田家樂盈盈老瓦盆

發長安堰

夏老蟲聲切晨興草木香買瓜倚綠樹出水撐青秧船
聚知邨近牛閒覺晝長雙鳬蓮葉蕩無雨故生涼

張弋

寄趙紫芝

獨游非一事書札故應遲江上逢春日湖邊憶醉時有
雲為我伴終日誦君詩百鳥鳴花樹聲聲在遠思

得山中友人書

近得山中信
山中頗寂寥
酒方收秫釀
薪旋割茅燒
破屋多秋雨
平湖有暗潮
不曾逢客至
默坐過清宵

夏日從陳宗之借書偶成

自從春去後
少省出柴扉
樹暗鴉巢隱
簷空燕語稀
憶山憐有夢
當暑詠無衣
案上書堆滿
多應借得歸

送杜晦之兄弟歸閩

秋來猶苦熱
歸去莫貪程
官寫新銜位
詩傳舊姓名
幾

家邨酒賤一路澗泉清想到鄉閭日爭省兩弟兄

簡周宗聖

曠野有芳芷近江無早鶯春詩定多少旬日又清明樹
暗憐楊柳花開認橘橙相尋每乖阻夢裏亦愁生

游長干留寄聰公

僧去尋芳草客來看落花就齋槃乞米借水鼎烹茶日
炙春無色風吹天有沙欲回成再住此意問林鴉

慈母磯

莫嫌舟逆上子細得看山衆草名難識孤花影自閒
避人鷹翅響經雨石文斑夜久江風冷神仙定往還

寄別顏伯奇

情深袂怕分豈不欲辭君轉柁方乘曉思山已隔雲
菊當前路見雁在半江聞把盞秋纔好遙憐白鷺羣

送宋謙父之清江因簡希亮

吟詩夕陽裏相送上瀟灘前路逢梅處同誰倚棹看
歲窮風力緊江闊雁聲寒持此呈蘇李人生識面難

高郵送紫芝

重逢又重別把盞更淒然明日帆開岼平湖水接天好
詩應自作狂夢與誰圓我欲來相趨楊州且住船

送胡道士歸康廬

避世懷孤往為菴近五巒出無人作伴歸有鶴相省老
石苔衣淨深山瀑布寒自言猶養母應未得燒丹

豫章別紫芝

吟苦事俱廢拙深貧未除年來如旅燕秋至即移居古

道行黃葉空囊貯素書一生江海恨惟子最知余

彭蠡阻風寄城中故人

欲行行未得累日滯孤舟月照山皆近風吹水倒流地
名人不識秋景客相愁憶爾惟成夢遙知獨倚樓

留滯

蕭條十餘日留滯別人居借吏抄陳作黏碑學草書煙
青數邨晚月落一潭虛吾自疑秋色那堪樹木疎

再送丕父

弟行兄出送有約共憑闌草木雨初過江河路轉難同
懷年各長重別酒無歡明日雙鐘下蒼崖應獨省

送徐和卿之上饒

江樹雜丹青江雲少得晴亦知君去路多是水為程銜
位猶書岳游從半作卿如逢二泉子因說野人名

晝坐

出門無所往獨自坐牙牀雨濯殘梅盡風吹百草長近
邇人喜戰偶病客傳方不奈春愁密思君對酒觴

趙汝鎡

贈隱居

遶屋垂垂柳當軒小小江買魚尋晚釣浮蟻倒春缸山
近雲侵座月來梅映牕隱居誰似子不羨鹿門龐

倚樓

蒹葭秋色晚百尺倚江樓日暗烟藏寺風高浪拍舟歸
雲投遠嶺飢雁叫滄洲心事非年少塵埃白盡頭

舟中

繫纜停征棹斜陽古渡頭風霜先遠客天地獨扁舟
水鳥衝開浪汀鴻占斷秋在家貧亦好何用出林丘

夏日普信寺江閣

到此全無暑虛欄千里風看飛雲度水聽落石鳴空日
月忙烏兔春秋遞燕鴻一生塵裏過煙艇羨漁翁

過寶雲寺訪密師

寺繞三二里曳杖且徐行晴塔松梢見風鐘嶺半鳴樵
夫分道過僧子就房迎竹有千竿立塵無一點生

信步

午牕方睡起信步過東畦穴徙蟻知雨巢穿燕補泥路
埤連草沒果重壓枝低邨婦抱兒子籠邊教喚雞

送彥東還湘

湘南多爽處羨子片帆還秋影清涵水烟痕淡著山蘭
風香楚珮竹淚冷湘斑見說誅茆地江頭只數間

宿方家店

昏暮方投宿敢嫌茆屋低池清月易入林密鳥爭棲買

酒春芻蕘求蔬夜摘畦路長莫貪睡囑僕早聽雞

暮行江上

江天詩眼闊沙岬暮扶藜風怒來帆卸林昏宿鳥迷問
魚前港有沽酒小童攜夜客留同飲添杯剪韭畦

遣愁

愁來無可奈散策小橋東影轉松隨日香殘花怯風煙
霞詩興裏天地酒杯中本是江湖客生涯付釣蓬

次莊過荆渚以詩寄之

澤國遙千里風帆隔兩州
醉行沙市月吟破渚宮秋
魚
歎馮驩缺貂殘李子裘
人傳君入蜀無事早歸休

劉簿約遊廖園

名園新整頓尊酒約追隨
春晚花飛少牆高蝶度遲
注
淞童暖酒拍案客爭棋
寂寞鞦韆索無人盡日垂

秋夜懷歸

鄉里千山月塵埃兩鬢星
秋聲雖是爽客耳不堪聽
多
淚風前燭孤明竹外螢
吟蛩更無賴終夜幾曾停

宿古寺

黃昏投寺宿古屋瞰荒江村酒沽春甕山房耿夜釭灘
高聲撼枕月落影收牕僧老人皆翫樓鐘曉未撞

舟中

離家俄十日千里獨衰翁蓬響過雲雨帆開逆水風新
沙增岸脚小港隱蘆叢客思難消遣黃昏月一弓

東邨

晴久全無雨溪乾半是沙風橫分雁陣日轉趣蜂衙地

僻草埋徑蘼催菊卧花橋西一林竹瀟灑兩三家

醴陵道中

入得湖南界皆嫌堠子長煙巖松葉暗風陌稻花香橋
斷人迂路車鳴水卷塘宿程雖不遠木杪已斜陽

日融

日融風力軟曳杖獨逍遙蜂去花心靜鶯遷柳影搖一
年春易老兩鬢雪難消客至時留飲無緣特地招

范園避暑

六月暑如炊追涼此地宜
棹舟荷柄颭坐石竹陰移籌
貫壺雙耳鼎烹茶一旗小童供
筆硯醉客競賡詩

常山道中

寒謝春纔展恩恩二月中
算來晴幾日多是雨兼風
烟草迷春碧山桃夾竹紅
浮名能役我策馬幾回東

夏夜

今夕暑差甚芒鞋階下迎
除燈簷月上却扇竹風生病
骨坐難久靜吟詩易成夜
涼思睡去樓鼓已三更

乍晴

日色今朝穩園林二月中池塘展暗綠桃杏鬪春紅犯
險升高徑扶衰藉小童黃鸝怕人見飛過野橋東

江閣夜

小閣臨江迴疎簾帶霧鈎雲鴻遙影滅灘月碎光流詩
思偏宜夜衰髯不耐秋漁燈三兩點隱隱荻花洲

聞舟中笛

橫笛秋蓬底銜山夕照殘孤音起水面餘韻到雲端吹

怨蘆聲慘含淒雁影寒有人江閣上歛翠憑闌干

過曹家渡

數篙撐過渡雨後水添肥山橋青迷樹野花香襲衣
哀鴻悽遠客闌雀墮斜暉童稚喧林壑牛羊箇箇歸

御選宋詩卷四十一

謹案第十六頁後三行虛庭雲片泊側徑石根侵
按葦碧軒集作幽泉來鷺浴積翠隔蟬吟與此
異

第二十一頁前三行筍鞋行曲廊刊本鞋訛鞭據
芳蘭軒集改





總校官庶吉士臣侍朝

校對官檢討臣蕭九成

謄錄舉人臣李駟